

三水縣志卷八

知縣朱廷謨主修

陽湖孫星衍撰

名人十一

舊志載人物至無典則第五倫賜宅見本傳而以為在三水歸義鄉蒲東社是誤以宋第五均為倫也倫頡種皆長陵人盧芳安定三水人第五琦長安人俱於此縣無涉蓋近代縣中有第五氏因欲揚其前代也文彥博裔孫汝昌始遷于幽亦不應入志今從俗載之不用全傳文其隋皇甫誕及無逸乃安定朝那人今無其族則竟削去若唐侯君集等實是此縣人故詳列于左

第五倫字伯魚京兆長陵人也肅宗卽位代牟融為司空連以老病上疏乞身元和三年賜策罷以二千石奉終其身加賜錢

三水縣志卷八

五十萬公宅一區後數年卒時年八十餘詔賜秘器衣衾錢布

右後漢書本傳

倫少子頡嗣歷桂陽廬江南陽太守所在見稱順帝之為太子廢也頡為太中大夫與太僕來歷等共守闕固爭帝卽位擢為將作大匠卒官

右後漢書第五倫傳

倫曾孫種字興先遷兗州刺史中常侍單超積懷忿恨遂以事陷種竟坐徙朔方初種為衛相以門下椽孫斌賢善遇之於是斌將俠客晨夜追種及之於太原遮險格殺送吏因下馬與種斌自步從遂得脫歸種匿於閭甄氏數年徐州從事臧旻上書訟之會赦出卒於家

右後漢書第五倫傳

第五訪字仲謀京兆長陵人司空倫之族孫也補新都令政平
化行三年之間鄰縣歸之戶口十倍遷張掖太守歲饑粟石數
千訪乃開倉賑給以共敝順帝璽書嘉之由是一郡得全歲餘
遷南陽太守去官拜護羌校尉邊境服其威信卒於官案第五
陵人舊志載入三水因邠志賜田宅三十六所三水歸義鄉蒲
東社乃其一也倫因居焉其說不知何据今既非縣人亦不全
載漢書本傳也

右後漢書循吏傳

盧芳字君期安定三水人也居左谷中王莽時天下咸思漢德
芳由是詐自稱武帝曾孫劉文伯更始至長安徵芳為騎都尉
使鎮撫安定以西更始敗三水豪傑共計議以芳劉氏子孫宜
承宗廟乃共立芳為上將軍西平王芳與兄禽弟程入匈奴單
于遂立芳為漢帝建武五年李興閔堪引兵至單于庭迎芳與

三水縣志卷八

俱入塞都九原縣掠有五原朔方雲中定襄鴈門五郡並置守
令六年芳舉郡降光武令領職如故十六年乃立芳為代王明
年正月其冬芳入朝南及昌平有詔止令更朝明歲芳自道還
憂恐乃復背叛遂反匈奴遣數百騎迎芳妻子出塞芳留匈奴
中十餘年病死案太子賢注引續漢書曰三水縣有左谷故城
在今涇州安定縣南則芳涇州人俗志誤列于此

右後漢書本傳

魏侯植少倜儻仕魏為義州刺史從孝武西遷破沙陀平江陵
以有功累遷大總都督封汧源縣君

右邠州志

皇甫璠字景瑜三水人世為西州著姓後徙居京兆父和本州
治中璠少忠謹有幹略永安中補主簿以勤事被知每蒙褒賞

歷官計部下大夫孝閔踐祚進驃騎大將軍開府儀同三司出爲隴右總管府長史璠性平和小心奉法安分守志恒以清白自處建德三年授隨州刺史政存簡惠百姓安之卒諡曰恭子諒少知名位至吏部下大夫

右周書本傳

侯君集幽州三水人以材雄稱少事秦王幕府從征討有功擢累左虞候車騎將軍封全椒縣子預誅隱太子尤力王卽位拜左衛將軍進封潞國公邑千戶真觀四年遷兵部尙書俄檢校吏部尙書參議政李靖討吐谷渾以君集爲磧石道行軍總管師次鄯州議所向君集曰王師已至而賊不走險天贊我也若以精兵掩不備彼不我虞必有大利若遁阻山谷克之實難靖然其計簡銳士約齎深入追及其衆於庫山大戰破之進會大

非川平其國會詔世封功臣授陳州刺史更封陳羣臣不願封進吏部尙書君集本以行伍奮不知學後貴益自喜好書及典選分明課最有譽於時吐蕃圍松州授當彌道行軍大總管以擊之高昌不臣拜交河道行軍大總管出討王麴文泰笑曰唐去我七千里殲鹵二千里無水草冬風裂肌夏風如焚行賈至者百之一安能致大兵乎使能頓吾城下一再旬食盡當潰吾且係而虜之君集次磧口而文泰死子智盛襲位進營柳谷侯騎言國方葬死君諸將請襲之君集曰不可天子以高昌驕慢使吾襲行天罰今襲人於虛墓間非問罪也於是鼓而前賊嬰城自守遣諭之不下乃刊水塞塹引撞車毀其堞飛石如雨所向無敢當因拔其城俘男女七千進圍都城初文泰與西突厥欲谷設約有急相援及是欲谷設益懼西走智盛失援乃降高

昌平君集刻石紀功還初君集配沒罪人不以聞又私取珍寶
婦女將士因亦盜入不能制及還京師有司劾之詔君集詣獄
薄對中書侍郎岑文本諫曰高昌之罪議者以其遐遠欲置度
外唯陛下奮獨見之明授決勝之略君集得指期平殄今推勞
將帥從征之人悉蒙重賞未踰數日更以屬吏天下聞之謂陛
下錄過遺功無以勸後且古之出師克敵有重賞不勝蒙顯戮
當其有功也雖貪財縱欲尙蒙爵邑其無功也雖勤躬絜已不
免鈇鉞故日記人之功忘人之過宜爲君者也昔李廣利貪不
愛卒陳湯盜所收康居財物二主皆赦其罪封侯賜金夫將帥
之臣廉慎少而貪沒多軍法曰使智使勇使貪使愚故智者樂
立其功勇者好行其志貪者邀趨其利愚者不計其死是以前
聖使人必收所長而棄所短陛下宜申宥君集俾復朝列以勸
有功帝寤釋不問君集自恃有功以它罪被繫居怏怏不平會
張亮出洛州都督君集謬激說曰何爲見排亮曰公排我尙誰
咎君集曰我平一國還觸天子嗔何能排君因攘袂曰鬱鬱不
可活能反乎當與公反亮密以聞帝曰卿與君集皆功臣今獨
相語而無左驗柰何秘不發待君集如初皇太子承乾數有過
慮廢知君集怨望因其壻賀蘭楚石爲千牛私引君集入問自
安計君集舉手謂曰此手當爲殿下用之又遣楚石語承乾曰
魏王得愛陛下若有詔召願毋輕入承乾納之然君集常畏謀
洩忽忽不自安或中夕驚吒妻怪之曰公國大臣何爲爾若有
所負宜自歸首領尙可全不從承乾事覺捕君集下獄楚石告
狀帝自臨問曰我不欲令刀筆吏辱公君集辭窮不能對帝語
羣臣曰君集於國有功朕不忍寘諸法將丐其命公卿其許我

乎羣臣皆曰君集罪大逆不道請論如法帝乃謂曰與公訣矣
今而後徒見公遺像已因泣下遂斬之籍其家君集臨刑面色
不變謂監吏曰我豈反乎蹉跌至此然常爲將破二國若言之
陛下丐一子以守祭祀帝聞原其妻及一子徙嶺表始帝命李
靖教君集兵法旣而奏靖且反兵之隱微不以示臣帝以讓靖
靖曰方中原無事臣之所教足以制四夷而求盡臣術此君集
欲反耳靖爲右僕射君集爲兵部尙書同還省君集馬過門數
步乃覺靖語人曰君集其有異慮乎後果如言

右唐書本傳

第五琦字禹珪長安人少以吏幹進頗能言彊國富民術賀蘭
進明才之奏爲錄事參軍肅宗駐彭原進明遣琦奏事帝悅拜
監察御史勾當江淮租庸使遷諸道鹽鐵鑄錢使當軍興隨事
趣辦人不益賦而用以饒乾元二年進同平章事貶忠州長史
寶應初起爲朗州刺史有異政拜太子賓客改京兆尹加判度
支鑄錢鹽鐵轉運常平等使坐與魚朝恩善貶括州刺史德宗
素聞其才將復用會卒

右唐書本傳

范祥字晉公三水人進士及第自乾州推官稍遷殿中丞通判
鎮戎軍元昊圍城急祥帥將士拒退之歷知慶汝華三州提舉
陝西銀銅坑冶鑄錢祥曉達財利建議變鹽法後人不敢易稍
加損益人輒不便累遷度支員外郎權轉運副使改置解鹽使
卒嘉祐中包拯言祥通陝西鹽法行之十年歲減權貨務緝前
百萬其勞可錄熙寧中權陝西轉運副使張誥奏朝廷復洮隴
故地自將帥至裨佐悉有功賞臣見洮渭父老言皇祐中轉運

使范祥因熟羌數被寇掠其部屬願輸土置城以爲守禦乃卽古渭爲砦消沮邊隙可謂知守攻之利冀推原舊功少賜褒卹使天下知祥死猶被恩且舒祥忠義之氣詔贈秘書錄一子子育字巽之舉進士爲涇陽令以養親歸從張載學有薦之者召見授崇文校書監察御史裏行神宗諭之曰書稱聖讒說殄行此朕任御史意也育因薦張載等數人知河中府加直集賢院徙鳳翔以直龍圖閣鎮秦州元祐初詔爲太常少卿改光祿卿都承旨出知熙州時議棄質孤勝如兩堡育爭之曰熙河以蘭州爲要塞此兩堡者蘭州之蔽也棄之則蘭州危蘭州危則熙河有腰膂之憂矣又請城李諾平汝遮川曰此趙充國屯田古榆塞之地也不報入爲給事中戶部侍郎卒紹興中採其抗論棄地西夏及進築之策贈寶文淵閣學士

右宋史本傳

宋文彥博字寬夫仁宗時同富鄭公知平章事以右師卒于家進封潞國公諡忠越九世孫海海孫汝昌汝恭遷於幽

宋焦寅宋康定時人少與橫渠先生遊喜談兵

宋第五均倫之後性喜典墳倜儻有威儀能振興學校累官至司空參知政事後自涇陽徙居幽之蒲東社祀鄉賢祠

元第五居仁字士安倫之後博通經史躬率子弟力農嘗行田間遇竊已桑者仁輒避之鄉里高其行生徒滿門皆學明行脩門人私謚曰靜安先生

元蕭元義官御史至正十一年居官家洞廣務農桑築塞立石隱居一十三年以避兵

右舊志

元喬忠字公信南宮里人由進士明宗時爲治中別駕有廉聲碑刻存焉

右邠州志

明文振潞公十三代孫洪武初貢士官監察御史賦性剛直權執莫撓其法嘗以言見謫充吏三日士壅三日素志不渝遷河南按察司僉事未幾遷雲南交趾廉使以病卒凡邠支族悉振裔也

明劉澤字惠民任廣安州判陞樾爲知縣執法不阿調洪雅政事清勤城池學校俱所新修食惟青菜蜀人皆曰青菜劉陞雅州知州單車之任撫按薦云百爲能做乎古一廉足勵乎俗陞夔州府同知後至僉事

明文在中字少白年十九登解元二十三中會魁廷對擬第一

江陵相以策兩孽未除之語惡其刺已而抑之終授祠部郎未三十挂冠歸建樂育書院負笈從遊者甚衆著有觀宇天經等書孝友睦俗邑人爲建減糧永思碑歲祀鄉賢祠

明文運熙字和一振曾孫萬歷癸未進士天資穎悟過目成誦有神童之稱初仕中書科巡十庫陞工部員郎權浙江南新關力剔重算商賈建祠尸祝之陞紹台海防參議挂冠歸里課農教子以樂天年

明文在茲字少公萬歷辛丑進士聰穎過人目數行下長古文辭工八分楷字

明文翔鳳字太青在中子庚戌進士仕三陽文學政事並著提督山右學政擢光祿少卿閉門著述潛心皇極經世之學貴達公卿經年不見其面著太微經九極篇曰皇極南極西極東極

北極天極地極人極物極世以爲堯夫之後一人而已

明杜應強字乾齋弱冠中舉人初就河南開封教諭陞南陽令耿介廉明邑人誦之曰杜母歷任三載遷成都別駕致仕歸明第五嗣先字石嶽第五倫四十九代孫弱冠舉於鄉潛心理學與魯源徐公等校著證學集官贊皇令建學宮崇文教積義倉粟以賑士置漏澤園以掩骼躬脩滹沱水堤擢金華郡丞適值倭寇督兵進勦而渠逆授首丁艱家居明族教子後隱甘峪之谷灌園種樹每誡子孫母隕越祖宗出處家風云

明文毓鳳字太彤在中子壬子舉人初授山左武城令未幾奉母西歸結廬於終南之御宿川日與諸弟子講論著森園集琳園學水園草

明第五緯字彪字第五倫五十代孫萬歷庚子舉人學宗橫渠初授郟縣教諭重脩橫渠祠陞來安令課士勲懇擢兩淮鹽運司副疏通鹽法力絕苞苴有廉聲

明文運衡字澄吾萬歷己酉舉人初任山西黎城令轉昌平知州性耿介多才能陞開封府同知督理河工著績擢衛輝知府歷三載遷蔚州道致政歸年八十卒

明張任字碧岑萬歷戊午舉人初任原武尋調臨潁陞大興知縣奸宄斂跡吏治稱最擢計部主事差兩淮餉務再差山右糧儲以不困飛輓加級陞湖廣衡州府太守未幾張憲忠入寇舉家徇難

明趙鳳雛字霞城崇禎丙子舉人官平陸縣知縣却安置銀二百兩還驛騾四十匹蔡中丞薦其操守歲餘以疾卒櫬歸之日士民涕泣薦紳賻助始得還葬

明馬致遠增廣生爲人慷慨友愛少棄功名遊京兆間於舞生壇門拾五十金訪爲龍門大戶所遺卽還其人晚年尤好義恤貧脩葺廟宇享年八十餘有司屢旌其門曰高士云

明文翹鳳字天傳縣學生性孝友少而勤學杜門究舉子業繼父之志力行善事助人五十金完婚煮粥以濟里貧施棺以掩道殮孝父養志居鄉謙約

明張心昌字見心縣增廣生倜儻多奇節崇禎卯辰間蝗旱涸臻昌相度地勢開縣河南北兩渠灌漑數邨明末不逞之徒聚衆作亂禍及全邑陰合鄉勇撲滅之地安堵爾

明趙文翰字特中縣學生家貧嗜學事嫡母溫清撫諸姪如己子鄉人推重

明文竣中字少蒼運熙子幼夙慧讀書一覽不遺以恩例入太學能臨池作飛白書諸生愛之性仁厚不以父爵有貴介氣鄉人某曾恃酒侮之惟溫語慰去無芥蒂意慈親嘗怒泣而受杖起敬起孝父卒水米不入口者五日強而後粥斷葷酒聲色廬墓三年有白兔出隊青鶴巢松之異邑人舉之直指特疏旌表縣官歲給穀布

右舊志

任世亨附學生明萬歷中值歲歉出粟賑飢活人無算鄉鄰德之舉鄉飲介賓年九十九而卒

馬際臯學增生好獎與士類性剛介不阿凡人事有理曲者望廬服罪邑令楊比之王彥方云

任之綸字彌生學廩生以品行端方舉鄉飲介賓父疾不解帶者累月及沒竟以憂卒

右事實

文濤字雪崖毓鳳子少有駿才戊子廷試通判改授河南布政司理問委署襄城釐弊剔奸課士訓農饒有政聲歷二載以疾卒於官闔邑賻助櫬始歸里焉

趙登高八世同居恩義相接鄉人稱曰居家當效三水趙事聞

上旌其門曰世承聚順賜綵緞二疋及

御製七言詩一章詩曰同居數世史稀見九歲之間三見之詎讓魏書詔楊李果然周化在幽岐一門八代不分箸六十五人常共炊屢與捫詞示旌表端因爲治重綱維

第五憲文歲貢生字師古有孝行舉優居親喪泣血三年不飲酒食肉不御內服闋猶泣不自已鄉人化之知縣董旌其里曰仁讓之鄉

文學洙字觀瀾學生員善事繼母昏定晨省出入必告年至六十始終如一閭里稱其孝

申哲功字遜齋每遇歲歉慷慨樂施乾隆十三年大飢日不舉火者二百餘家哲功盡出所積之粟按口給之全活無算邑人感誦知縣伍尊旌其門

文朝錦務農積粟好善樂施

恩賜壽官

門中桂學生員端方正直濟貧周急不吝已財鄉黨感戴

右事實

三水縣志卷七終